

CURPA TA CANSA: PROME MINISTER A SALI PA MERCA CU VAKANTIE

11 December, 2024, 8:16 pm



Diaranson mainta mr. Evelyn Wever-Croes, compaña pa su casa Kenneth Wever, a sali rumbo pa Merca pa por disfruta di un vakantie bon mereci. Despues di casi ocho aña na cabes di gobierno y despues di a pasa den tres luna intensivo di eleccion, awo ta momento pa bay recarga e baterianan. E intencion ta pa por desconecta di celular y di trabou y pa por shop poco y prepara pa Pasco cu ta den porta caba.

TOCANTE EVELYN WEVER-CROES

Evelyna Christina "Evelyn" Wever-Croes, un hurista y fiscalista, naci dia 5 di december 1966, a asumi e puesto di Minister Presidente di nos pais dia 17 di november 2017. El a bira e prome hende muhe pa encabesa gobernacion di pais Aruba, despues di Henny Eman, Nel Oduber y Mike Eman.

El a participa den eleccion pa prome bes pa Partido Movimiento Electoral di Pueblo (MEP) na aña 2009 riba number 3 di e lista y a logra 1621 voto. Na aña 2011 el a asumi liderazgo di e partido cu su mesun omo a funda na 1971 y a bira e prome lider femenino di e partido, despues di defunto Betico Croes y Nel Oduber. Como lider den eleccion na aña 2013 el a logra 3396 voto individual, den eleccion di september 2017, aunke e partido a bay dilanti cu 2 asiento, toch e votonan individual no a aumenta tanto, pero tabata bon pa 3503 voto riba su number, cu ta representa un aumento di 3.15%. Den e eleccion na 2021, Evelyn Wever-Croes a kibra su mesun record di voto, ora el a redobla su votonan personal y a yega 7518 voto! Den eleccion di dia 6 di december 2024, el a cay cu 14% y a yega na 6474 voto individual, manteniendo su posicion di "vote-getter" di Aruba!

Evelyn Wever-Croes ta casa cu Kenneth Wever desde aña 1991 y ta mama di Claudine Wever, Christine Wever y Kevin Wever y ta wela di Trystan Wever.



E minister-president demisionario di nos pais, brasa cu su casa Kenneth Wever na nan cas na Sero Blanco. El a biaha pa Merca pa por descansar poco despues di a caba di perde eleccion.

TOCANTE PARTIDO MEP

Gilberto F. "Betico" Croes a funda Movimiento Electoral di Pueblo (M.E.P) dia 9 di Februari 1971. Lidernan desde su fundacion tabata Gilberto F. "Betico" Croes, Nelson Oduber y Evelyn Wever-Croes. A participa 17 biaha den eleccion. Record maximo di voto: 25,172 (2001) y record minimo di voto: 8095 (1973). Den e ultimo eleccion na december 2024, partido MEP a cay den voto y a logra 17.560 voto, bon pa 8 asiento den Parlamento. Nan ideologia ta Social democrata.